



Na osnovu člana 57 i 58. Zakona o lovstvu ("Službene novine Federacije BiH", broj 4/06), Statuta LD „Jelen“, i Pravilnika o vrsti i broju pasa za lov na pojedine vrste divljači u određenim područjima, Predsjedništvo LD „Jelen“ donosi

## **PRAVILNIK O VRSTAMA, BROJU I UPOTREBI PASA U LOVU**

### Član 1.

Ovim Pravilnikom se propisuju vrste i broj čistokrvnih lovačkih pasa sa položenim ispitom urođenih osobina za lov na pojedine vrste divljači unutar lovišta „Gradašnica“.

### Član 2.

Lov sa čistokrvnim lovačkim psima dozvoljava se unutar lovišta u skladu sa ovim Pravilnikom.

Čistokrvni lovački psi u smislu ovog Pravilnika jesu svi psi koji pripadaju jednoj od zvanično priznatih lovačkih pasmina od strane Međunarodne kinološke federacije (FCI) i posjeduju zvanični Rodovnik izdan od jedne od članica Međunarodne kinološke federacije (FCI).

### Član 3.

Svi članovi LD „Jelen“, koji imaju lovačkog psa, dužni su dostaviti kopiju rodovnika referentu/Komisiji za lovnu kinologiju, najkasnije 30 dana od dana donošenja ovog Pravilnika.

Referent/Komisija za kinologiju vodi evidenciju o lovačkim psima, te upisuje sve eventualne promjene (ocjene na izložbama, utakmicama, ispit urođenih osobina itd.)

Po uginuću, prodaji ili nestanku lovačkog psa (dužem od 6 mjeseci), imalac lovačkog psa odmah obavještava referenta/Komisiju za kinologiju, koja lovačkog psa briše iz evidencije. U slučaju nabavke novog psa, imalac dostavlja kopiju rodovnika u roku od 30 dana.

Referent/Komisija za kinologiju podnosi mjesečni pisani izvještaj o broju, stanju i promjenama koje se tiču lovačkih pasa u vlasništvu članova LD „Jelen“ Gradačac.

### Član 4.

Sitna divljač se lovi uz pomoć lovačkih pasa goniča, ptičara, cunjavaca, retrievera, terijera i jazavčara koji imaju položen ispit urođenih osobina.

Krupna divljač (samo divlja svinja) lovi se uz pomoć lovačkih pasa goniča, jazavčara, terijera i krvosljednika, koji takođe moraju imati položen ispit urođenih osobina.

Terijerima i jazavčarima s položenim ispitom urođenih osobina dopušten je lov jamarenjem na lisicu, jazavca, kune i tvorove, uz iskopavanje, a u skladu sa utvrđenim kalendarom lova za tekuću godinu.

## Član 5.

Pse goniče dozvoljeno je koristiti u lovu samo u vremenu od 01.10. tekuće pa do 05.01. naredne godine.

Van lovne sezone, zabranjena je upotreba pasa u lovištu, van terena i vremena predviđenog za obuku lovačkih pasa, sa izuzetkom krvosljednika za nalaženje ranjene divljači. Teren za obuku lovačkih pasa unutar lovišta utvrđuje Predsjedništvo, a vrijeme dozvoljeno za obuku pasa je od 01.08 tekuće pa do 05.01. naredne godine.

Nije dozvoljeno koristiti lovačke pse noću, osim kod rada na krvnom tragu, i lova šljuka i močvarica na preletu. Kao noćno vrijeme drži se razdoblje od dva sata nakon zalaska sunca do dva sata prije izlaska sunca.

## Član 6.

U svakom lovu, pojedinačnom ili grupnom, u kojem je propisana upotreba lovačkih pasa u skladu sa Zakonom o lovstvu, moraju biti osigurane pasmine i broj pasa prema odredbama ovoga Pravilnika.

Skupni lov divljači čije tehnike lova zahtijevaju lovačkog psa ne može se započeti i obavljati ako u njemu ne sudjeluje najmanje jedan lovački pas na tri sudionika.

Osoba koja rukovodi lovom (lovovođa) dužna je odmah otkazati lov, odustati od njega, odnosno prekinuti ga ako se lov ne odvija u skladu s uslovima iz ovog Pravilnika.

Lov sitne divljači čije tehnike lova zahtijevaju lovačkog psa ne može se započeti i obavljati bez njega.

Grupni lov divljači čije tehnike lova zahtijevaju lovačkog psa ne može se započeti i obavljati ako u njemu ne učestvuje najmanje jedan lovački pas na pet (5) učesnika.

## Član 7.

Stručna osoba za provedbu lovnoprivredne osnove, lovovođa i lovočuvari dužni su kontrolisati pravilno provođenje lova u skladu sa Zakonom o lovstvu, te sprječavati svaki lov ako nije proveden prema uslovima iz ovoga Pravilnika.

Vlasnik i vodič lovačkog psa dužni su na zahtjev, ovim osobama predložiti sve potrebne dokaze za postojanje uslova iz Člana 2. ovog Pravilnika.

## Član 8.

Ovaj pravilnik stupa na snagu danom donošenja.

U Gradačcu, dana .....

Predsjednik:

---

M.P